

Daxboh Daejnga' nga

□ Bouxij: Yih Co/陆世初 Bouxhoiz: Lwgfwngzme/卢奋长

It: Dauq Ranz

Daxboh youh dwk denva daeuj lo. Denva dwg mehyah gou ciep. Daxboh youq ndaw denva naeuz, bet nyied cibngux yaek daengz lo, muengh gou caeuj mehyah dauqma ranzmbanj caeuj de gvaq ciet. Daxboh lij youq ndaw denva naeuz bae naeuz dauq, bineix duzbit ndaw ranz maj ndaej gig biz, neix dwg aenvih geij raq fwn laeng seizcou haenx, hawj raemx Dahgvangh mbouj mboekhawq, hawj gyoengq bit ciengx youq henz dah haenx ndaej lai gwn di mez, yienghneix duzbit cix maj ndaej ndei. Daxboh lij naeuz, boux beixnuengx youq Byamiuz haenx gaeb ndaej duz haet ndeu soengq daeuj hawj de, seizneix ciengx youq ndaw roengq, caj dou dauqma guhdoi h gwn.

Daxboh gangj geij yiengh saeh neix dwg muengh dou gaejbah nyaengq lai gonq, dauq ranz caeuj de doxcomz. Daxmeh gvaqseiq liux, ndaw ranz lw daxboh boux vunz dog. Dou goj yaek ciep de haeuj ndaw singz daeuj, hoeng de yiem youq mbwq lai, aenvih mbouj miz vunz caeuj de ganggoj guhcaemz, mbouj geij ngoenz cix heuh ma lajmbanj lo. De naeuz, ndaw sim de cuengq mbouj roengz geij moux reihnaz ndaw ranz haenx, engq cuengq mbouj roengz daxmeh haem youq ndoeng go'ndoe ranz baihlaeng haenx. Daxboh guh gvenq hongreih hongnaz gvaq, mbouj gyaex youqndwi. Daxboh bineix ndaej roekcib bi yaq, de guhhong lij ak lij gyaek dem, gij reihnaz ndaw ranz de cungj ndaem doenghgo, cienzbouh guh liux mbouj lw saek gaiq. Dou naeuz de de caemh mbouj dingq, de han naeuz de rox raeuz gwn imq sawj doh, hoeng bouxguhnaz lawz cix miz gij dauhleix mbouj guhhong ne? De youq ndaw denva daengq son gou naeuz:

“Bouxguhnaz seizlawz ndaej yietnaiq? Daengz ngoenzdai moek haeuj ndaw namh bae caengj ndaej.” Gij neix dwg gij caenleix de nyinhdingh haenx.

Mwh gou caeuj mehyah dauq daengz ranz, daxboh gaengq gaj bit ndei gvaq. De naeuz, duzhaet baez gaj ndei cix cauj caengj ndei gwn, dou song bouxsai cix dawz duzhaet daeuj gaj.

Haemhde, gwn gvaq caeuz le, dou buen aencong haeuj gyanghongh bae yawj ronghndwen. Dou baek diuz yieng ndeu coh baih aenmoh daxmeh, baij ndei di bingcibhaj, lwgmak caeuj diengz, caemhcaiq raix di laeuj caz dem. Guh liux gij neix, dou cungj hoznet raixcaix, aenvih dou roxndeq daxmeh banneix gaengq caeuj gyoengqdou caemh ndwn youq gizneix yawj ronghndwen.

Dauqngex daxmeh, dwg daxboh dwen gonq. Daxboh gangj le haujlai saeh ciuhvunz daxmeh. Dingq le, gou cim coh ronghndwen, cim bae aen ronghndwen lumjbaenz aen giuz laux mong, ndawde miz raemx fubfed.

Haet daihngex dou cix dauq ndaw singz. Youq ndaw ranz byaij bae byaij dauq mbouj raen daxboh, mwh ngamq naemj okdou bae ra daxboh, de cix nyoengx dou byaij haeujdaej, gwnz din dwg namhboengz gyanh, byoemgyaeuj mbangbyagbyag doxgeux de dumz caez, najbyak cix lai lwenq di. De ce gyoi roengzdaej, daj ndawde dawz ok geij bog duh, dwg duh de gag ndaem, mbouj dwk vafeiz caeuj ywnon nauq, hawj dou dawz bae cimzcimz, de boux vunz ndeu gwn mbouj liux.

Cuengq ndei duh, de youh daj ndaw rug dawz aen daehnizlungz ndeu okdaej, dwk gij doxgaiq ndaw daeh haeuj sienglaeng aenci bae, aensieng yaek coux mbouj ndaej caengj daengx roengzdaej.

De naeuz, doenghgij doxgaiq cungj dwg huq ndei ndaw ndoeng, miz raet caeuj ywbouj, dawz bae rung raemxdang gwn gig ndei. Yawj ndaej ok gij doxgaiq neix cungj dwg de daegdaengq bwh ndei. Dauq daengz ndaw singz, mwh dou beuj doxgaiq ndaw ci, raen aen daeh ndaem ndeu, mehyah geizheih dwk hai yawj, ndawde dwg song cien maenz ngaenz, dwg gou haemhlwenz aeu hawj daxboh, de mbouj noix saek faen youh soengq doxdauq.

Ngeih: Cousou

Bet nyied cibngux gvaq caengz nanz, daxboh youh dwk denva daeuj.

De naeuz haeux ndaw ranz sou

liux gvaq, bineix mbouj deng nonhaih, haeux baenz dahraix, coenzhauq angqyoekyoek de lumjnaeuz yaek daj ndaw denva saet okdaej diuq foux angq hawj vunz lai nei.

Daxboh naeuz, de yaek soengq di haeuxniu ndaw ranz daeuj hawj gou, gou raen mbouj yungh, cix doi naeuz mbouj aeu. Hoeng de lij yaek soengq daeuj dem, gou cix hozndat lo. Mehyah cix doq ciengj denva gvaq bae, riunyumnyum caeuj daxboh doxgangi.

Cuengq denva liux, mehyah hongz gou naeuz, daxboh ndiep raeuz caengj soengq haeuxniu daeuj, mwngz gaej hawj de doeknaiq, mwngz lij hozndat dem, mbouj baenz bw. (1)



▲Ginhsiu Yauzcuz Swciyen daengngoenz ngamq daj ndaw bya hwnj. Yi Sienghczeng inj

Lauxdoengz

□ Moz Lijginz / 磨礼勤

Vunzcongnyenz naeuz: “Mbouj youqgaenj mbouj youqgaenj, song dah lwgnyez baenzneix nyinhcaen yunghsim doegsaw, gou soengq sou baema hix suengq dwg gou ok di rengz bangcoh ma!”

Gangj sat, de couh dwk denva heuh song dah lwgsau daeuj riu dach saw roengz henz loh bae cang haeuj gyaq ci ndeu bae.

Ci neix dwg cungj ci maqhu hung ndeu, saek ndaem cab di lamz, moqsaksak, Liuz Fanghfangh caeuj Vangz Meijyen song fwngz lumh bae

lumh dauq, vunzcongnyenz riu naeuz: “Aen ci neix ndei mbouj?” Liuz Fanghfangh naeuz: “Ndei lai lo, aeu geij fanh maenz cij cawx ndaej?” Vunzcongnyenz riugokgoek, Vangz Meijyen hozhaenz naeuz: “Miz ci fuengbienh lai lo, gyaex bae gizlawz couh bae gizlawz.” Vunzcongnyenz naeuz: “Baezlaeng sou hix cawx cungj ci neix, hai daengz daengx guek gak dieg bae guhcaemz.” Vangz Meijyen naeuz: “Dou ndaej cawx cungj ci baenzneix ndei ha? Dang

lauxbanj cij cawx ndaej.” Liuz Fanghfangh naeuz: “Gou raen aen ci mwngz ceiq ndei lo, gou yawj mbouj miz aen ci lawz beij aen ci mwngz ndei.” Vunzcongnyenz riu naeuz: “Mwngz hauhneix gangj, gou rimhoz dangqmaz, hwnj ci lo.”

Vunzcongnyenz hawj daxmeh Vangz Meijyen naengh baihlaeng de, daj gingqfanjiuq yawjraen song dah lwgnyez lumj song duz roeg nei muenghyawj rog cueng. De cam: “Song boux siujbaengzyoux dwg baez

daih' it daeuj Nanzningz?” Liuz Fanghfangh naeuz: “Dwg ha, Nanzningz gizgiz cungj ndei yawj.” Vunzcongnyenz naeuz: “Ndeiyawj gou couh hai ci menh di.” Vangz Meijyen coi naeuz: “Mwngz menh daengz seizlawz bae, dou dungx iek yaek dai lo.” Vunzcongnyenz nyaenx mbouj ndaej “ho ho ho” sing hung riu hwnjdaej, yawjraen baihnaj “Hom Gag Daeuj Bouqhaeux Hung” couh hai ci haeujbae, daengx ci youq gvangjcangz.

“Roengz ci gwn haeux ya.” Vunzcongnyenz heuh. Vangz Meijyen dou ci hai mbouj ok, vunzcongnyenz riu naeuz: “Mbouj gaenj, naenx giz gaet haenx, gaem lahsouj rag coh mwngz.”

(29)